

Փաստարկված երիտասարդական քաղաքականության զարգացմանն ուղղված քաղաքականության դիրքորոշում



Երիտասարդական ուսումնասիրությունների ինստիտուտ, օգոստոս, 2018թ.

Կառավարության ներկայիս փոխակերպումների, օպտիմալացման գործընթացներում կարևոր է չկատարել քայլեր, որոնք կվնասեն փաստերի և գիտելիքի վրա հիմնված պետական քաղաքականությանը:

Փաստարկված, գիտելիքի վրա հիմնված երիտասարդական քաղաքականության կարևորությունը անհրաժեշտ է կառավարությանը հասկանալու համար, թե որոնք են պետական քաղաքականության ձեռքբերումները և բացերը, ինչպես նաև ունենալ օբյեկտիվ հիմք, փաստեր՝ հաշվետու լինելու հանրության լայն շերտերին, մասնավորապես **երիտասարդներին**:

Երիտասարդական ուսումնասիրությունների ինստիտուտը՝ որպես անկախ հետազոտական կենտրոն, փաստարկված երիտասարդական քաղաքականությանն աջակցող և երաշխավորող մեխանիզմ է, ինչի ստեղծման համար 5 տարիների ընթացքում ներդրվել են ռեսուրսներ ինչպես պետական, այնպես էլ միջազգային աղբյուրներից: Ինստիտուտը ստեղծվել է ՄԱԿ-ի Զարգացման ծրագրի ֆինանսավորմամբ ՀՀ Սպորտի և երիտասարդության հարցերի նախարարության «Երիտասարդական միջոցառումների իրականացման կենտրոն» ՊՈԱԿ-ի կազմում: Ինստիտուտը իրականացրել է մի շարք հետազոտություններ, որոնք հիմք են հանդիսացել երիտասարդական քաղաքականության մշակման համար, Ինստիտուտի անձնակազմը անցել է կարողությունների զարգացման երկարատև ճանապարհ, Ինստիտուտն ունի հասարակական և պետական ոլորտի ներկայացուցիչներից կազմված Խորհուրդ, Ինստիտուտը ձևավորել է տեղական և միջազգային կառույցների հետ համագործակցային ակտիվ ցանց:

Ինստիտուտի գործունեությունը ունի լուրջ հիմքեր՝ պատմություն, փորձ, անձնակազմ, աջակցելու կառավարությանը մշակելու պետական քաղաքականության և ռազմավարության մոնիթորինգի, գնահատման մասնակցային մեխանիզմներ:

Նոր կառավարության կազմում այժմ բարձր պաշտոններ են զբաղեցնում երիտասարդներ: Առհասարակ նոր **կառավարության կազմի միջին տարիքը զգալիորեն երիտասարդ է** նախորդ կառավարության համեմատ: 2018թ. Կառավարության ծրագրով ևս շեշտված է երիտասարդությանն ուղղված պետական քաղաքականության կարևորությունը: Այս ամենը բավականին լուրջ նախադրյալներ են ստեղծել ակնկալելու, որ **երիտասարդները գտնվում են նոր կառավարության ուշադրության կենտրոնում**:

Այժմ կառավարությունն ունի պետական կառույցների թիվը օպտիմալացնելու դիրքորոշում:

Երիտասարդական ուսումնասիրությունների ինստիտուտը կողմ է պետական կառույցների օպտիմալացման քաղաքականությանը: Համաձայն Ինստիտուտի կողմից իրականացված գնահատման՝ երիտասարդական ոլորտը կարիք ունի միջգերատեսչական ակտիվ և համակողմանի համագործակցության, ինչին ուղղված նոր կառավարության քայլերը ողջունելի են, քանի որ դա ևս հանդիսանում է պետական ռեսուրսների օպտիմալացում: Սակայն Ինստիտուտի լուծարումը պետական կառույցների օպտիմալացման շրջանակներում կվտանգի Հայաստանում փաստարկված երիտասարդական քաղաքականության մշակման գործընթացը: Մինչ Ինստիտուտի լուծարումը կարիք կա նախ և առաջ խորությամբ ուսումնասիրելու և հասկանալու Ինստիտուտի գործունեությունը՝ Հայաստանում փաստարկված երիտասարդական քաղաքականության համատեքստում, ինչպես նաև մշակել Հայաստանում փաստերի և գիտելիքի վրա հիմնված պետական քաղաքականության զարգացման նոր այլընտրանքային մոտեցումներ, ինչում Ինստիտուտը իր նախկին փորձով կարող է և պատրաստ է կիսվել:

Կոչ ենք անում պետական ռեսուրսների օպտիմալացման շրջանակներում՝

-առանց լուրջ հիմնավորման չվերացնել փաստարկված երիտասարդական պետական քաղաքականության գործող մեխանիզմները:

-երիտասարդների զարգացմանն ուղղված բոլոր ծախսերը համարել ներդրում, քանի որ երիտասարդությունը ռազմավարական նշանակություն ունեցող թիրախ խումբ է:

-միաժամանակ երիտասարդներին մասնակից դարձնել իրենց մասին որոշումների կայացմանը, ինչը երիտասարդները վաստակել են:

Առաջարկում ենք՝

- Պետական ռեսուրսների օպտիմալացման նպատակով պետական կառույցների լուծարմանն ուղղված քայլերում հատուկ ուշադրություն դարձնել փաստարկված պետական քաղաքականության կայուն գործող մեխանիզմներին, և լուծարելու որոշումը կայացնել հանրային քննարկման սկզբունքով՝ երիտասարդների ակտիվ մասնակցությամբ՝ ընդ որում ինչպես Երևանի, այնպես էլ մարզերի: Երիտասարդական ուսումնասիրությունների ինստիտուտը պատրաստ է ներդնել իր ջանքերը, կազմակերպել հարթակներ հանրային քննարկումների համար:
- Առաջարկում ենք իրականացնել հետազոտություն՝ ուղղված երիտասարդների այսօրվա կարիքների խորքային ուսումնասիրությանը, ինչին Ինստիտուտը կարող է և պատրաստ է աջակցել:
- Առաջարկում ենք զարգացնել փաստարկված երիտասարդական քաղաքականության մեխանիզմները, ինչպես նաև ներդնել նոր և այլընտրանքային մոտեցումներ, ինչին ևս Ինստիտուտը կարող է ակտիվորեն ներգրավվել, հատկապես որ վերջին 5 տարիներին Ինստիտուտը հանդիսացել է միակ հետազոտական կենտրոնը՝ մասնագիտացված երիտասարդների հարցերի ուսումնասիրմամբ:

Երիտասարդական ուսումնասիրությունների ինստիտուտի թիմ

Հակիրճ տեղեկատվություն Երիտասարդական ուսումնասիրությունների ինստիտուտի մասին

Երիտասարդական ուսումնասիրությունների ինստիտուտը հետազոտական անկախ կենտրոն է՝ ուղղված երիտասարդների վերաբերյալ խորքային մասնագիտական ուսումնասիրությունների իրականացմանը, փաստարկված երիտասարդական պետական քաղաքականության և ռազմավարության մշակման գործընթացների աջակցությանը, պետական քաղաքականությանը՝ երիտասարդների մասնակցության մեխանիզմների մշակմանը: Երիտասարդական ուսումնասիրություններով մասնագիտացած մեկ այլ կառույց Հայաստանում չկա:

Ինստիտուտը ստեղծվել է 2013թ. ՄԱԿ-ի Զարգացման ծրագրի աջակցությամբ: Հինգ տարիների ընթացքում իրականացրել ենք մի շարք հետազոտություններ: Ինստիտուտի կողմից իրականացրած հետազոտությունների հիման վրա մշակվել և իրականացվել են մի շարք ծրագրեր՝

- Երիտասարդների զբաղվածության մակարդակի բարձրացմանն ուղղված պետական ծրագրեր,
- Երիտասարդական աշխատողի ինստիտուտի կայացմանն ուղղված ծրագրեր,
- Երիտասարդական քաղաքականության մշակման գործընթացներ:

2013-2017թթ. երիտասարդական ռազմավարության մոնիթորինգի և գնահատման արդյունքների հիման վրա մշակվել է 2018-2022թթ. պետական երիտասարդական ռազմավարության նախագիծը: Գնահատման շրջանակներում Ինստիտուտը իրականացրել է մի շարք հանրային քննարկումներ՝ երիտասարդների ակտիվ մասնակցությամբ՝ Երևանում և մարզերում՝ դուրս բերելու երիտասարդների առաջնային կարիքները:

Երիտասարդական պետական քաղաքականության մոնիթորինգի և գնահատման այդ գործընթացը աննախադեպ է՝ քանի որ **անկախ փորձագետների միջոցով գնահատվել են պետական քաղաքականության արդյունքները, ինչին ակտիվորեն մասնակցել են երիտասարդները:**

Կարևոր ենք համարում նշել մի քանի փաստ Ինստիտուտի մասին՝

- Թիմը բաղկացած է երիտասարդներից,
- Բացի հիմնական անձնակազմից, Ինստիտուտը բոլոր մարզերում ունի համակարգողներ,
- Ինստիտուտը ձևավորել է տեղական և միջազգային կառույցների հետ համագործակցային ակտիվ ցանց՝ «ՂԻ ՎԻ ՎԻ Ինթերնեյշնլ», «ՄԱԿ-ի Զարգացման Ծրագիր», 50-ից ավել երիտասարդական ՀԿ-ներ, ՀՀ վիճակագրական կոմիտե, The EU-CoE youth partnership:
- Ինստիտուտի թիմի անդամները անդամակցում են միջազգային հետազոտական ցանցերին: Ինստիտուտի տնօրեն Մարինա Գալստյանը 2017թ մարտից Եվրոպական երիտասարդության հետազոտողների ցանցի անդամ է, իսկ Ինստիտուտի վերլուծաբան Լիլիթ Ավդալյանը 2018թ-ից սկսած հանդիսանում է Երիտասարդական քաղաքականության գիտելիքի եվրոպական կենտրոնի ազգային թղթակից:

Ինստիտուտի գործունեության հաշվետվություններին առավել մանրամասն կարելի է ծանոթանալ կայքէջում՝ www.ystudies.am: